



25. juni 2013

Inatsisartut Suleriaasianni § 37 naapertorlugu Naalakkersuisunut apeqquq imaattoq matumuuna saqqummiuppara:

Meeqqat angerlarsimaffeqanngitsut inisseqqittarnerat pillugu apeqquqit:

- 1. Naalakkersusiut pilersaaruteqarnerlutik nalunaarut aqqutigalugu inisseqqittarfiit, pisortat inissiaatileqatigiiffiisa inunnut anisitaasunut neqeroorutigisartagaasa pitsaassusaannik minnerpaaffiliinissaminnut (tassunga ilaatillugit ilaqtariit meerartallit) – assersuutigalugu piumasaqaatigalugu init kiassagaanissaat, innaallagiqarnissaat imeqarnissaallu aamma nillartaartitsiveqarnissaat, igaffeqarnissaat, errorsiveqarnissaat, anartarfeqarnissaat uffarfeqarnissaallu?**
- 2. Naalakkersuisut naapertuuttutut isiginerlugu, INI-p inisseqqinneqartut nuuttarmagit – aamma ilaqtariit meerartallit – qaammatit pingasukkaarlugit?**
- 3. Naalakkersuisut sulissutiginiarnerlugu inisseqqittarfinni pisortanit pigineqartuni inoqutigiinnillu arlariinnit atorineqartuni imigassartornissaq inerteqqutaassasoq taamatullu ilaqtariit meerartallit inisseqqinneqartut eqqissisimasumik toqqissisimasumillu ineqartarnissaat?**
- 4. Naalakkersuisut sulissutiginiarnerlugu ataqqineqassasoq, inisseqqinneqartut pisattaminnik sunik nassartarnissaat pillugu aalajangersaanermi eqqarsaatigineqartassasoq ilaqtariit meerartaqarnersut?**

(Inatsisartunut ilaasortaq Palle Christiansen, Demokraatit)

Tunnngavilersuut:

Kalaallit Nunaanni angerlarsimaffeqanngitsut pillugit nalunaarut Naalakkersuisuusimasut suliakkiissutigisimasaat maanna naammassisimalerpoq. Oqaatigisariaqarparalu: Nalunaarut attortinnarpoq. Ajornartorsiutit arlallit allaaserineqarput isummerfigisariaqakkagut.

Minnerunngitsumik meeqqat akuusimappata.

Nalunaarummi ilaatigut attartortut arlaannik pissuteqarluni pisortat attartortittagaataanniit anisinneqarsimasut allaaserineqarput. Eqqartuussiveqarneq pillugu inatsimmi aalajangersagaavoq –



25. juni 2013

eqqartuussummik naammassititsiniaasartut – tassa politiit – itigartitsissutigisinnaagaat attartortitsisut piunasaat malillugu attartortunik anitsitsinissaq, attartortut allami inissaqanngippata. Politiit taamaaliortarput taamaattumik INI aamma ISERIT pisussaapput pinngitsooratik inisseeqqiffissamik tunisissallutik, inatsimmi tamanna pisussaaffiliissutigineqanngikkaluarpalluunniit.

Nalunaarummi siusinnerusukkut atuuttumik pisortat attartortitsisartui pisussaatinneqarput inisseeqqinnissaminnut, politiit anitsitsiniarnerminnut atatillugu tamanna piunasarippassuk. Nalunaarummi aamma allassimavoq piunasaqaataasoq inisseeqqiffiup kiassagaanissaa naammaginatunillu perusersartarfeqarnissaa. Nalunaarulli 2002-mi atorunnaarsinneqarpoq taamaattumik tamatuma kingorna allamik soqarnikuunngilaq.

Ilequuvoq illut ajornerpaat inisseeqqittarfittut atorneqartarmatat. Ilaat ima ajortigipput allaat attartortinneqarsinnaanatik. INI-li minnerpaaffeqartitsivoq. Inisseeqqittarfinni ilaqutariit minnerpaamik inimut ataatsimut inissinneqartartussaapput qaavatigullu kiassagaassapput, imeqassapput innaallagiaqassapput taamatullu igaffeqarlutillu uffarfeqassapput. ISERIT-mi taamaattoqartariaqanngilaq.

Inissiaatileqatigiiffiup INI-p inisseeqqittarfiutaani najugaqartut tunngaviusumik allamut inissinneqartassapput qaammatit pingasukkaarlugit. Nalunaarut naapertorlugu INI-p taamatut periuseqarnikkut kissaatigaa ineqartut namminneq inissarsiortarnissaat. Ineqartut inisseeqqittarfimmiinnerminnut akiliisassanngillat – inissiaatileqatigiiffiup akiligassat akilertarpei, INI-llu ernummatigaa inisseeqqinneqarnikut, initaarumallutik qinnuteqarnissaminnut piunassuseqartorsuunaviannigitsut, ilungersunnguaratik inisseeqqittarfinni akeqanngitsumik ineqartuassappata.

Inisseeqqittarfinni ineqartunut, nuutitaasaqattaartuarneq artornartutut misinnarpoq – ilaatigut pissutaalluni inuit ilisarismannngilluinnakkat ulluinnarni inooqatigilertarneri.



25. juni 2013

Pissutsit ilaat ajornartorsiortitsilersartooq tassaavoq inisseqqinneqartut ilaasa unnuarsuarmut imertarnerat nipiliortarnerallu. Inisseqqinneqarsimasut ilaat suliffeqartarput paarisariaqakkaminnik taamaattumik suliartornissaq artornarsinnaasarpoq ineqatigisat ilaat unnuarsuarmut nipiliortarpat. Aamma taamaappoq meeqqat atuartussat eqqarsaatigalugit.

Inisseqqinneqartut imatut nassataqaqqusaanngillat. Nalunaarut naapertorlugu INI-p Nuummi inisseqqinneqartunut neqeroorutigisarpaa soorlu madrasimik, qullernik, atuakkanik atisanillu nassartoqarsinnaasoq aammali nalunaarummi oqaatigineqarpoq INI-p sulisui INI-p malittarisassaanik assigiinngiiaartumik aqutsisartut. Naatsorsuutigaa ilaqutariit meerartaat pinnguaminnik nassarsinnaatitaassasut, naak tamanna nalunaarummi tikinneqarsimangikkaluartoq, kisiannili nillartaatitsivimmik nassarnissaq ajornarpoq, init inisseqqiffiusut taamaattunik peqanngikkaluarpataluunniit. Aamma assersuutigalugu ilaqutariit inisseqqinneqartut aamma fjernsynimik nassaqqusaanngillat. Inissaqarpiannginera tunngavilersuutigineqarpoq kisianni pissutaannginnerluni INI isumaqarmat inisseqqinneqartut ilorrisimaarpallaalissanngitsut: misigisimassanngillat angerlarsimaffeqarlutik, taamaassappat inisseqqittarfinniit akeqanngitsuniit aneqqinnaviannngillat.

Tamakku assigiinngitsunik isumaqarfigineqarsinnaapput. Ilaat aperissajunnarsipput inuit attartornerminnut akiliineq ajortut imaluunniit sanilimmut eqqissiviillortitsimanertik pissutigalugu anisitaasimasut akiliuttarnissaat inuiaqatigiit suliassarineraat. Allat eqqaasitsissutigissaqqaarpaat inuiaqatigiit nalilerneqartartut sanngiinnerminnut qanoq iliornerat tunngavigalugu. Isumaqarpungali ataaseq isumaqatigiinngissutigisariaqanngikkipput: Meeqqat pitsaasumik toqqissimasumillu peroriartornissaat qulakkeertariaqarpoq. Tamanna pisussaaffigaarput – pissuserissaarnissaq pillugu aammali Naalagaaffiit Peqatigiit Meeqqat Pillugit isumaqatigiissutaat naapertorlugu. Piumanngikkaluaruttaluunniit inisseqqittarfinni aamma meeraqarpoq. Minnerunngitsumik taakku eqqarsaatigalugit qulaaniittut apeqqutigaakka.

Apeqqutit akeqquneqarput tiguseraniit ullut sulliviit naliginnaasut qulit qaangiutsinnagit.